

四庫全書

集部

欽定四庫全書

集部  
梁文紀卷二  
三

詳校官庶吉士臣瑚圖禮

主事銜臣徐以坤覆勘

總校官進士臣楊懋珩

校對官中書臣王鍾泰

謄錄監生臣熊瀛

欽定四庫全書

梁文紀卷二

明 梅鼎祚 編

簡文帝

名綱字世績武帝第三子初封晉安王昭明太子薨立為皇太子在位二年為侯景

所弑廟曰太宗

與湘東王繹書

齊永明中文士王融謝朓沈約文章始用四聲以為新變至梁轉拘聲韻彌尚麗靡復踰於往時太宗在藩度肩吾與東海徐摛吳郡陸杲彭城劉遵劉孝儀弟孝威同被賞接及居東宮又開文德省置學士肩吾子信摛子陵吳郡張長公北地傅弘東海鮑至等充

其選與湘東王書論之○藝文  
載作答湘東王和受試詩書

吾輩亦無所遊賞止事披閱性既好文時復短詠雖是  
庸音不能閣筆有慙伎癢更同故態比見京師文體懦  
鈍殊常競學浮疎爭為闡緩玄冬脩夜思所不得既殊  
比興正背風騷若夫六典三禮所施則有地吉凶嘉賓  
用之則有所未聞吟詠情性反擬內則之篇操筆寫志  
更摹酒誥之作遲遲春日翻學歸藏湛湛江水遂同大  
傳吾既拙於為文不敢輕有倚撫但以當世之作歷方

古之才人遠則揚馬曹王近則潘陸顏謝而觀其遣辭  
用心了不相似若以今文為是則古文為非若昔賢可  
稱則今體宜弃俱為盍各則未之敢許又時有效謝康  
樂裴鴻臚文者亦頗有惑焉何者謝客吐言天拔出於  
自然時有不拘是其糟粕裴氏乃是良史之才了無篇  
什之美是為學謝則不屆其精華但得其冗長師裴則  
蔑絕其所長惟得其所短謝故巧不可階裴亦質不宜  
慕故胸馳臆斷之侶好名忘實之類方分肉于仁獸逞

郤克于邯鄲入鮑忘臭效尤致禍決羽謝生豈三千之  
可及伏膺裴氏懼兩唐之不傳故玉徽金甌反為拙目  
所嗤巴人下里更合郢中之聽陽春高而不和妙聲絕  
而不尋竟不精討錙銖覈量文質有異巧心終愧妍手  
是以握瑜懷玉之士瞻鄭邦而知退章甫翠履之人望  
閩鄉而歎息詩既若此筆又如之徒以煙墨不言受其  
驅染紙札無情任其搖襞甚矣哉文之橫流一至於此  
至如近世謝朓沈約之詩任昉陸倕之筆斯實文章之

冠冕述作之楷模張士簡之賦周升逸之辯亦成佳手  
難可復遇文章未陸必有英絕領袖之者非弟而誰每  
欲論之無可與語思言子建一共商推辯茲清濁使知涇  
渭論茲月旦類彼汝南朱丹既定雌黃有別使夫懷鼠  
知慙濫竽自恥譬斯袁紹畏見子將同彼盜牛遙蓋王

烈相思不見我勞如何

梁書。謝康樂靈運裴鴻臚子野。儒純南史作儒純昔賢下

有以字茂絕作義絕覈量作覆量妍手作妍耳藝文作有異巧拙終愧醜妍文之橫流作文章橫流無可與語  
吾子建南史作無可與晤  
思吾子建朱丹作朱白

答湘東王慶州收書

雖心慕子文申威涿郡意存士雅慷慨臨江而不能遂  
封狼居之山永空幕南之地逐北聊城追奔瀚海必欲  
卷綬避賢辭病收迹

答湘東王上王羲之書

試筆成文臨池染墨疏密俱巧真草皆得似望城扉如  
瞻星石不營雲飛之散何待曲辱之丹方當奉彼庭中  
置之帳裏乍措桐鉤時懸歌案戢意之深良不能已



報湘東王

元帝金樓子云余為江州時君賜報王克時為僕射顧選

京師有語云論議當如湘東王仕宦當如王克

太平御覽

答南平嗣王餉舞簞書

南平嗣王名恪

濯龍之木文罽飾壇淮南之臺紫羅為薦未若五離九折出桃枝之翠筍綺爛霞舒製雲母之脩竹南湘點淚喻也未奇東宮赤花擬之非妙

答定襄侯餉卧簞書

定襄侯名祗字敬叔衡山侯恭弟

筠篁多品篠蕩雜名枝色比奇獨此為貴自含蒼紫似

久暴於柯亭乍舒黝素若屢霑於湖水三伏餘炎九折

成用便可旅食南館高卧北牕

北戶錄作謝  
竿散卧簾啓

答新渝侯和詩書

新渝侯名映字文  
明初封廣信縣侯

垂示三首風雲吐於行間珠玉生於字裏跨躡曹左含

超潘陸雙鬢向光風流已絕九梁插花步搖為古高樓

懷怨結眉表色長門下泣破粉成痕復有影裏細腰令

與真類鏡中好面還將畫等此皆性情卓絕新致英奇

故知吹簫入秦方識來鳳之巧鳴瑟向趙始覩駐雲之

曲手持口誦喜荷交并也

誠當陽公大心書

大心字仁恕簡文帝子後封尋陽王侯景亂遇害

汝年時尚幼所闕者學可久可大其惟學歟所以孔丘言吾嘗終日不食終夜不寢以思無益不如學也若使牆面而立沐猴而冠吾所不取立身之道與文章異立身先須謹重文章且須放蕩

答安吉公主餉胡子一頭書

一頭見北戶錄

方言異俗極有可觀山高水遠宛在其貌不使去來執

轡媿彼青衣正當出入燒香還依丹轂豈直王濟女奴

獨有羅袴方便樂府行胡羞論歌舞垂賚新竒伏增荷

怵

南史云武帝女臨安安吉長城三主並有文才而安吉最得令稱

與劉孝綽書

孝綽嘗為廷尉正簡文帝為晉安王中普通四年為平西將軍雍州

刺史按此書意乃其時也

執別灑澆嗣音阻闊合璧不停旋灰屢徙玉霜夜下旅  
鴈晨飛想涼燠得宜時候無爽既官寺務煩簿領殷湊  
等張釋之條理同于公之明察雕龍之才本傳靈虵之

譽自高頗得暇逸於篇章從容於文諷頃擁旄西邁載  
離寒暑曉河未落拂桂棹而先征夕鳥歸林懸孤帆而  
未息足使邊心憤薄鄉思遭迴但離閭已久載勞寤寐  
佇聞還驛以慰相思

答張纘謝示集書

網好文章於今二十五載矣竊嘗論之日月參辰火龍  
黼黻尚且著於玄象章乎人事而况文辭可止詠歌可  
輟乎不為壯夫揚雄實小言破道非謂君子曹植亦小

辨破言論之科刑罪在不赦至如春庭樂景轉蕙承風  
秋雨且晴檐梧初下浮雲生野明月入樓時命親賓乍  
動嚴駕車渠屢酌鸚鵡驟傾伊昔三邊久留四戰胡霧  
連天征旗拂日時聞塢笛遙聽塞笳或鄉思凄然或雄  
心憤薄是以沈吟短翰補綴庸言寓目寫心因事而作

參初學記作三且  
晴作朝晴詠作謳

與蕭臨川書

蕭子顯宗正卿出為臨川內史子  
雲太府卿為臨川內史未定為何

零雨送秋輕寒迎節江楓曉落林葉初黃登舟已積殊

足勞止解維金闕定在何日八區內侍厭直御史之廬  
九棘外府且息官曹之務闕應分竹南川剖符千里但  
黑水初旋未申十千之飲桂宮既啓復乖雙闕之宴文  
雅縱橫即事分阻清夜西園眇然未克想征艫而結歎  
望桂席而霑襟若使弘農書疏脫還鄴下河南口占儻  
歸鄉里必遲青泥之封且覩朱明之詩白雲在天蒼波  
無極瞻之歧路春慨良深愛護波潮敬勗光彩

答蕭子雲上飛白書屏風書

赤牘作武帝答  
誤見載藝文

得所送飛白書縑屏蠢十牒冠六書而獨美超二篆而  
擅竒乍寫星區時圖鳥翅非觀觸石已覺雲飛豈待金  
璫便睹蟬翼聞諸衣帛前哲未巧懸彼帳中昔賢掩色  
牒一作疊 書斷云武帝謂蕭子雲言頃見王獻之書  
白而不飛卿書飛而太白可斟酌為之令得其衷子雲  
乃以篆文為之雅合帝意

據此豈或武帝答耶

答徐摛

摛字士秀東海剡人太宗初為太子  
轉家令兼掌管記後除太子左衛率

山濤有言東宮養德而已但今與古殊時有監撫之務  
竟不能黜邪進善少助國章獻可替不仰禪聖政以此



慙惶無忘夕惕驅馳五嶺在戎十年險阻艱難備更之  
矣觀夫全軀具臣刀筆小吏未嘗識山川之形勢介冑  
之勤勞細民之疾苦風俗之嗜好高閣之間可來高門  
之地徒重玉饌羅前黃金在握泥訾粟斯容與自憙亦  
復言羲軒以來一人而已使人見此良足長歎

弇州云  
按此書

端為朱异老姦發臺城之厄寧  
無遺恨千載而下讀之如新

### 與徐摛書

時設書幌乍置筆牀

北戶錄 段公路云南  
朝呼筆四管為一牀

與魏南荊州刺史李志書

志字鴻道潁丘衛國人魏通直散騎常侍

彪子建義初為南荊州刺史歸梁舊作東荊州誤

卿門世奕葉中州舊族自金天失馭帝鼎南遷衣冠播  
越不及俱邁豈可屈志羶戎久淪胡壤今皇師外掃天  
鉞四臨海蕩電飛雲蒸雨合所推所剋是卿之具聞也  
且偽國沸騰四方幅裂主虐臣姦北雞亂政若能早識  
事機翻歸有道豈直圖形長樂刻像鐘鼎時事易差相  
思勉勵但明月閣投昔人為誠鄰藩贈藥有可虛懷密

驛輕郵側望歸簡

並藝文類聚  
葉一作英華

奕

賀洛陽平啓

自函洛榛曠獫狫荐食久絕正朔之風不覩輶軒之使  
乘此戰心負斯戎足每興燔燧之警常勞守障之民自  
非聖略弘宣天網遐頓豈能使漢地盡收名王爭入方  
今九服大同萬邦齊軌亭塞寢兵關候罷拆臣誠兼家  
國倍深歡慶

啓囚徒配役事啓

伏以明慎三典寬簡八刑宸鑒每以垂心國誥是焉攸  
切臣比時奉敕旨權視京師雜事切見南北郊等處竝  
啓請四五歲以下輕囚助充使役優令聽獄官詳其可  
否舞文之路自此而生將恐玉科重輕全關墨綬金書  
去取更由丹筆愚謂宜詳立條制以為永準

### 謝邵陵王禁錮啓

邵陵王綸中大通四年為揚州刺史侵漁細  
民少府丞何智通啓聞綸令容戴子高於都巷  
刺殺之高祖令國綸第捕子  
高綸匿不出坐免為庶人

臣綸習近宵人不能改過屢犯明憲三入刑科昔繆彤  
掩扉曹儀著論布衣兄弟且相誠勗以臣居長終慙勸  
勵仰負慈嚴心顏戰慄

謝敕賚中庸講疏啓

若覩玄圭如觀金版洽日九披流光照灼慶雲五色垂  
采氤氲天經地義之宗出忠入孝之道實立教之關鍵  
德行之指歸自非千年有聖得奉皇門無以識九經之  
倫稟二門之致竊以周發上聖問五刑于箕子宣尼照

金史四庫全書  
卷二  
極訪六僂於耑弘未有懸鏡獨曉仰均神鑒方知始畫  
八卦風義有慙正名百物軒轅為陋

謝敕示苦旱詩啓

伏以九年之水不傷堯政七載之旱無累湯朝歲弘則  
公田已修農勤則我庾惟億今者亢陽以來為日未久  
將恐督郵不黜失在汝南之守曝齒未收無傷河南之  
尹而載勞興居仰發歌詠無愛珪璧有事山川菲飲食  
矣加之以撤膳焉中夜不寐加之以申旦焉此唐虞之

所闕如軒頊之所不逮

黜一作除

謝賚碧慮棊子屏風啟

臣網啓宣詔王佛慧奉宣敕旨垂賚碧慮棊子屏風二十牒極班馬之巧兼曹史之慮均天台之翠壁雜水華之嘉名使雲母之窻慙其麗色琉璃之扇愧其含影仰降聖慈曲垂霑逮喜逐恩來驩同鳳舞言因謝盡更類

三緘不任銘荷之誠謹奉啓謝以聞謹啓

水華藝文  
作水葉

謝賚扇啟

臣網啓傳詔饒僧明奉宣教旨垂賚細綾大文畫柳蟬  
山扇二柄文均析縷香發海檀肅肅清風即令象簟非  
貴依依散彩便覺夏室含霜飲露青蜩應三伏之脩景  
羣飛黃雀送六月之南風蔽日垂陰薰澤慙采浮涼滌  
暑蘋末愧吹聖人造物之巧俯萃庸薄王府好玩之恩  
於茲下被頂戴曲私伏增欣躍謹奉啓事謝聞謹啓

初學

記  
羣  
一作翔

謝敕賚織竹火籠啓



池冰始浮庭雪向飛慈澤無涯時錫香被製此簡枝雕  
斯早節文華九折用美十鑪

謝敕賚貂坐褥席啓

東瀛美毳不著馬彪之儀北朔文茵豈問張敞所記陰  
炭既重寒井猶冰特降殊私溫華曲被雖狐白千金織  
成千種李頌漢被揚降曹氈不足以髣髴洪慈連類聖  
澤

謝敕賚方諸劍等啓

纔發玉函彫竒溢目始開牙檢麗飾交陳已匹丹霞之  
暉乍比青雲之制身文自貴器用惟宜寒暑兼華左右

相照

玉一作紫  
牙一作泥

謝敕賚善勝威勝刀啓

芝田錄陶貞白有  
二刀名善勝威勝

冰錡含采彫琰表飾名均素質神號脫光五寶初成曹  
丕先荷其一二勝今造愚臣摠被其恩錫韓非之書未

足為比給博山之筆方此更輕

脫光河圖  
書作脫光

謝敕賜玉佩啓

臣綱言主衣裘智瑋奉宣敕旨垂賚臣玉佩一具藍田  
麗彩槐水鏤文飾以金闕之珠製以魯班之巧故以裾  
端照色影外生光思發內府猥垂霑賜臣方溫謝德比  
振慙聲沐浴深慈欣荷交至不任云云

藍一作昉

謝敕賚魏國獻錦等啟

山羊之毳東燕之席尚傳登高之文北鄴之錦猶見胡  
綾織大秦之草戎布紡玄菟之花

謝敕賚長生米啟

堯禾五尺未足稱珍漢苗九穗方斯非擬如隨瑞鹿若  
降神烏暮律向游獻春方始食乃民天之貴粒有延齡  
之名籍此資身因斯養性

謝敕賚益州天門冬啓

逮自星橋見珍玉壘本草稱其輕身延壽實為上藥姬  
晉之重丹桂曹丕之愛落英一蒙恩錫竊幸往代

謝敕賚城邊橘啓

結根壟首垂陰陽塹甘踰石蜜味重金衣暉章縹李豈

止稱於晉世上林美棗非獨高於漢日

謝敕賚河南菜啓

海水無波來因九譯周原澤洽味備百羞堯韭未儔姬  
歎非喻

謝敕賚大菘啓

吳愧千里之尊蜀慙七菜之賦是知泮宮採菘空入魯

詩流火烹葵徒傳幽曲

並藝文類聚

謝敕賚廣州堰等啓

州一作門

淮南承月之杯豈均符彩西國浮雲之椀非謂瓌竒臣  
南珍靡究未讀奏曹之表方物罕逢不識議郎之畫

太平

御覽

北戶錄載簡文帝為太子上武帝啓云綱啓  
謹奉紅牋二千番又云特送四色紙三萬枚

叙南康簡王薨上東宮啓

南康簡王績字世謹  
武帝第四子為江州

刺史母報徵授安右將軍頌石頭戍軍  
事大通三年薨于任東宮昭明太子

方當逸足長衢克固蕃屏而峰摧壁毀一朝云及綱兄  
弟各從王役東守西撫常願陪承甲館同奉畫堂預得  
西苑賦文北場旅食豈謂不幸獨隔昭世異林有悲飛

鳴斯切伏惟殿下愛睦恩深常棣天篤北海云亡騎傳  
餘藁東平告盡驛問留書嗚呼此恨復在茲日

湘東王答晉安王叙南康簡王薨書

前啓乃簡  
文為晉安

王時當亦及湘  
東故有此答

南康兄器宇冲貴風神英挺魏之中山徒聞退讓晉之  
扶風雖號師範用今方昔若吞夢雲及尋陽私疾孝感  
神明殆不勝喪扶而後起猶冀天道可期豈謂福善虛  
說且分違易久嘉會難逢綢繆宮閭不過紈綺之事離

羣作鎮動迴星紀之厯志冀雙鸞之集遽居四鳥之悲  
松茂柏悅夙昔歡忭芝焚蕙歎今用嗚咽

謝東宮賜柿啓

尺牘作  
元帝

懸霜照采凌冬挺潤甘清玉露味重金液雖復安邑秋

獻靈關晚實無以匹此嘉名方茲擅美

並藝文  
類聚

謝東宮賜裘啓

網啓蒙賚豹裘一領降斯止諒垂茲信服物華雉毳名  
高鶩羽網才慙齊相受白狐之飾德謝漢蕃均黑貂之



賜地捲朔風庭流花雪故以裾生惠氣袖起陽春荷  
澤知慙瞻恩興戀不任下情謹啓事謝聞謹啓

初學記

### 讓驃騎揚州刺史表

常願親侯就列希同特進之班角巾還第不競龍驤之  
賞天澤無涯名器惣集竊以驃騎之官既為上將神州  
之重實號中土故以彈壓六戎冠冕九牧豈止司隸絳  
節金吾緹騎况復任摠皇畿位重連率何則驃騎之號  
歷選為重元狩之中始自去病永平之建特授劉蒼齊

憲為公主所申吳漢因羣臣之舉

太平御覽

在州羸疾自解表

昔違紫複曾不弱冠今夢青蒲逝將已立願歸之謁不  
逮宸矜民請之書遽降天允屬上黨之雄山西宣將五  
校失道八尉驕貪一箭而解重圍更成戎阻九戰而絕  
甬道翻就喪師雖王郭不追朱買難嗣實以褰襜明目  
日夜厲精地雜黠羌民多獷俗人非公孝欲使任類汝  
南勳異伯宗必須榮踰戊己州牧良才實屬多士無令

非薄徒積妨賢

謝為皇太子表

伏見詔書以臣為皇太子有命自天實驚物聽鴻名盛  
典爰萃庸薄勢舉千鈞方茲未重高搏九萬比此非遙  
臣本凡蔽賓實無取特以毓慶雲霄憑暉璿極鳴玉內  
侍指麾外蕃猶懼不任尚疑廢職况復監撫守從道著  
前經恭敬溫文義彰昔記震維禮絕離景事尊養德北  
宮贊業東序魏平非擬漢莊靡繼臣收拙樊漢始獲言

歸遂以下才屬當上嗣事異定陶之舉有類膠東之冊  
將何以著三善之德延四皓之遊屈叔譽之辭繹卞蘭  
之頌

拜皇太子臨軒竟謝表

臣聞團暉麗天洊雷居震必資令德寔建賢明臣本空  
薄器業無取已慙好儒之志且乏豐下之姿叨逢慈獎  
事出希世方將問安寢門視膳天幄察陳奏之章示嚴  
警之書出龍樓而祇召息車馳道侍鑾輿而巡幸說經

孔庭足踐閭闔風雲之勢斯近飛陵倒景神仙之舉超  
然何以允副元良和茲守器逢師曠之褒值史丹之述  
為武陵王讓揚州表

臣延首青冥傾心紫府言非東里誠譬北辰而滔滔雲  
漢不被沛然之澤鬱鬱仙居方隔下臣之奏周任量力  
固請所陳明主理奪伏冀照許臣聞繫風捕影涉求之  
路靡階玉馬金舟適遠之資無託

為南康王會理讓湘州表

絲言自天而忽委王刻披雲而下墜浮舟千仞呂梁之  
暢已深摠轡萬尋懸車之懼非淺

為長子大器讓宣城王表

襄野之辯尚對軒君弘羊之計猶干漢主徒以結慶璿  
源乘蔭霄極一日千里因騏驥之馳高蔭百尺藉雲崖  
之遠熙祖流聰慧之稱方建臨淮之國元仲表岐嶷之  
資乃啓平原之封南郡奧部春穀名區民化仲翔之俗  
山峻陵陽之嶺而綠車赤綬交映相暉金璽銀券炤灼

光彩

為子大心讓當陽公表

中大通四年以皇孫封當陽公

日蝕之餘無黃童之對荷戟入榛異子烏之辯遂復早  
建茅社夙聞井賦爵列五等綬參四色

為子大款讓石城公表

跪對鶴書俯羞鶴翼臣生處深宮未覲焦原之險不出  
戶庭豈觀砥柱之峻臣聞坳塘沉水豈議大瀆之流覆  
簣為峰終乖小魯之說

卷二  
為寧國臨城二公入學表

簡文子大臨大同二年封寧國公大連封

臨城公俱入國

學射策甲科

臣聞瞻彼緝弧既次良冶相諸筍玉猶藉他山故沮渙  
之水可居鄒魯之鄉為貴下帷投斧昔人以為精力弃  
竿委麥先哲以為美談伏惟陛下弘至德之微言闡無  
為之妙說話郊講道不勞費生之議就陽啓位無待公  
玉之圖願得齒年國胄隨肩選造

上昭明太子集別傳等表



臣聞無懷有巢之前書契未作尊盧赫胥之氏墳典不  
傳若夫正少陽之位主承祧之則口實為美唯稱啓誦  
自茲厥後罕或聞焉昭明太子稟仁聖之姿縱生知之  
量孝敬兼極溫恭在躬明月西流幼有文章之敏羽籥  
東序長備元良之德蘊茲三善弘此四聰非假二疎寧  
勞四皓虎賁恧其經學智囊慙其調護豈止博望延賓  
壽春能賦問疑棗據書戒憑陵而已哉玉折何追星顏  
靡續地尊號嗣外陽之術無徵位比周儲緱山之駕不

反臣以不肖妄作明離出入銅龍瞻仰故實思所以掄揚盛軌宣記德音謹撰昭明太子別傳文集請備之延閣藏諸廣內永彰茂實式表洪徽

請右將軍朱异奉述制旨易義表

臣聞仰觀俯察定八卦之宗河圖洛書符三易之教譬彼影圭居四方之中極猶彼黃鍾總六律之殊氣疑關永闢踰弘農之洞啓辭河既吐邁龍門之已鑿臣以庸蔽竊尚名理鑽仰幾深伏惟舞蹈冒欲請侍中右衛將

軍臣異於玄圃宣猷堂奉述制旨易義弘闡聖作垂裕  
蒙求謹以表聞伏願垂允

請尚書左丞賀琛奉述制旨毛詩義表

臣聞樂由陽來性情之本詩以言志政教之基故能使  
天地咸亨人倫攸序故東魯夢周窮茲刪採西河紹魏  
著彼續述叶星辰而建詩觀斗儀而命禮以為陳徐雅  
頌膏肓匪一燕韓篇什痼疾多端北海鄭君徒逢箋釋  
南郡太守空為異序庶令中和永播碩學知宗大胥負

師國子咸紹孝敬之德化洽天下多識之風道行比屋

謝賜新厯表

五司告肇萬壽載光瑄叶璧輪慶休寶厯班和布政懸  
闕徇道式弘敬授之典載闡浹辰之敬

又謝賜新厯表

璿籥環璣鳳司肇律觀斗辨氣玉瑄移春萬福惟新孔

固天保

讓鼓吹表

寬博為善不飾被於聲明緣寵成功未增榮於鏡管豈  
宜響芳樹於西河鳴朝飛於黑水彼已之譏何懼尸素  
之誠知慙

上白兔表

瑞表丹棱祥因舊沛四靈可邁既驗玉衡之精千歲變  
采有符明月之狀豈殊丹岫之羽來止帝梧庶比素質  
之禽得遊君圃

為南平王拜大司馬章

臣度連宸萼地寔璿跗王業權輿夙奉締構爰頌虛綰  
同贊密謀豫均鄧禹俱奉明詔故搏飛九萬實假扶搖  
之力冲天百尺無俟剗劂之勞

為王規拜吳郡太守章

臣今願歛衽後思循墻所忝示山河而形勝顧浮橋而  
不見蒼鷹一遊望仙掌而逮然方當駕吉祥之車入句  
吳之地驅緹扇之馬撫奉德之鄉製錦何階棼絲方始

請條置徒作疏

武帝大同中刑獄枉濫徒居作  
者具五任其無任者著升械帝

在春宮見而愆  
之上疏不從

臣以比時奉敕權視京師雜事竊見南北郊壇材官車  
府太官下省左裝等處上啓並請四五歲以下輕因助  
充使役自有刑均罪等愆目不異而甲付錢署乙配郊  
壇錢署三所於事為劇郊壇六處在役則優今聽獄官  
詳其可否舞文之路自此而生公平難遇其人流泉易  
啓其齒將恐玉科重輕全關墨綬金書去取更由丹筆  
愚謂宜詳立條制以為永准

武帝手救

頃年以來處處之役唯資徒謫逐急充配若科制繁細  
義同簡約切須之處終不可得引例興訟紛紜方始防  
杜姦巧自是為難更當別思取其便也

並隋書

臨雍州原減民間資教

誠欲投軀決堤曝身求雨九伐方弘三驅未息役爨之  
憂兵家斯急興師之費日用彌廣今春流既長艫舳爭  
前轉漕相追饋糧不闕義存矜急無俟多費



臨雍州革貪惰教

壯夫疲於擲甲匹婦勞於轉輸藜藿難充轉死溝壑春  
蠶不暖寒肌冬收不周夏飽胡寧斯忍復加剝削傷盜  
抵罪遂為十一之資金作贖刑翻成潤屋之產

圖雍州賢能刺史教

冀州表朱穆之象太丘有陳寔之畫或有留愛士氓或  
有傳芳史籍昔越王鎔金尚思范蠡漢軍染畫猶高賈  
彪矧彼前賢寧志景慕可並圖象廳事以旌厥善

罷雍州恩教

折以片言事關往聖寄之勿擾傳彼昔賢故刻木不對  
畫獄無入吾自之雍矜懷罔狂幸得天無虛旱地歇怪  
蟲今軸車行塗舟艍且戒植柳官度尚或依然寄飯曹  
僖猶思恩宥况義化君民節離寒暑憫茲歧路宜留惠  
澤

復臨丹陽教

昔越張脩猛用弘美績邇延善政實著民謠吾冲弱寡

能未明理道猥以庸薄作守京河將恐五袴無謠兩岐  
難頌思立恩惠微宣風範

移市教

臨淮作守白鹿隨而忘反蕭令解綬黃雀從而歸况  
復衛卒遮車追民擁榜瞻言前古眇愧弘多吾旅泊冬  
川阻茲涸水日中總會交貿遷移雖樊無外取要得所  
求而旗亭舊體自有常處不容近違孔奮遠逐曹參正  
恐舊肆盈虛或成彫廢

資遣孔燾二女教

夫思人生至輕事惟悼往表閭式墓義匪字孤至如游  
殷之息見撫張既橋玄之子受託魏王斯故美在令終  
受兼身後故無錫令孔燾經術弘長志履貞槩遊處積年  
一朝長往聞其在室二女並未有行可廣訪姻家務求  
偶對

甄異張景願復讎教

夫理感禽魚道均荆棘亦有鄉因行改江以孝移張景

願自縛到郡稱其父為韋法所殺今於公田渚斬法級  
祭墓訖束身歸官昔沂澤撫劍河南執戟遠符古義實  
足可嘉防廣刃讎赦其桎梏之罪丁蘭雪恥擢以大夫  
之位

孔休源喪令

金紫光祿大夫孔休源立身中正行已清恪昔歲西浮  
渚宮東泊粉壤毗佐蕃政實盡厥誠安國之詳審公儀  
之廉白無以過之奄至殞喪情用惻怛今須舉哀外可

備禮

與湘東王令

王規字威明瑯琊臨沂人騫之子為太子中庶子大同二年卒太子出臨與湘東王令

世說新語補及尺牘作昭明太子誤昭明以中大通三年四月薨五月立簡文帝為皇太

子至六年後始改元大同而王規以大同二年卒則所稱皇太子者正簡文也是時昭明

薨凡五年矣梁書紀傳自明

威明昨宵奄復殂化甚可痛傷其風韻適正神鋒標映  
千里絕迹百尺無枝文辯縱橫才學優贍跌宕之情彌

遠濠梁之氣特多斯實俊民也一爾過隙永歸長夜金

刀掩芒長淮絕涸去歲冬中已傷劉子今茲寒孟復悼

王生俱往之傷信非虛說

劉謂劉孝綽

又

蕭愷子顯第二子除太子洗馬遷中舍人太宗在東宮早引接之時中庶子謝岷出守建

安於宣猷堂宴餞並召時才賦詩愷詩先成其辭又美太宗與相東王令

王筠本自舊手後進有蕭愷可稱信為才子

與衡山侯恭手令

恭字敬範南平王偉子

雍州蠻引魏冠詔恭赴援仍除寧蠻校尉雍州刺史太宗少與恭游特被賞狎至是手令恭至州治果有聲績

彼士流骯髒有關輔餘風黔首扞格但知重劍輕死降胡惟尚貪恠邊蠻不知敬讓懷抱不可皁白法律無所用施願充實邊戍無數遷徙謀候惟遠箱庾惟積長以控短靜以制躁早蒙愛念敢布腹心

與劉孝儀令

尺牘作昭明太子此與前論王規之誤一也

劉遵字孝陵彭城安上里人有學行文為晉安王宣惠雲鹿二府記室轉南徐州治中



王後為雍州復引為安北諮議參軍帶邱縣令及王立為皇太子仍除中庶子遵自隨藩及在東宮偏蒙寵遇大同元年卒太子深悼惜之與遵從兄陽羨令孝儀令

賢從中庶奄至殞逝痛可言乎其孝友淳深立身貞固  
內含玉潤外表瀾清美譽嘉聲流於士友言行相符始  
終如一文史該富琬琰為心辭章博瞻玄黃成采既以  
鳴謙表性又以難進自居未嘗造請公卿締交榮利是  
以新沓莫之舉杜武弗之知自阮放之官野王之職栖  
遲門下已踰五載同僚已陟後進多升而怡然清靜不以

少多為念確爾之志亦何易得西河觀寶東江獨步書籍所載必不是過吾昔在漢南連翩書記及忝朱方從容坐首良辰美景清風月夜鷁舟乍動朱鷺徐鳴未嘗一日而不追隨一時而不會遇酒闌耳熱言志賦詩校覆忠賢摧揚文史益者三友此實其人及弘道下邑未申善政而能使民結去思野多馴雉此亦威鳳一羽足以驗其五德比在春坊載獲申晤博望無通賓之務司成多節文之科所賴故人時相媿偶而此子溘然實可

嗟痛惟與善人此為虛說天之報施豈若此乎想卿痛悼之誠亦當何已往矣柰何投筆惻愴吾昨欲為誌銘并為撰集吾之劣薄其生也不能揄揚吹噓使得騁其

才用今者為銘為集何益既往故為痛惜之情不能已

已耳

梁書 馴雉南史作馴翟 右自與湘東王令至此雖並稱令然實書也與他令固自不同

### 劉孝儀上東宮啓

亡從弟遵百行無點千里立志同氣三荆之友假寢十起之慈皆體之於自然行之如俛拾自碣宮陪宴釣臺

從幸攀附鱗翼三十餘載茫昧與善一旦長辭劔匿光  
芒璧碎符采躬搖神筆親動妙思雖每想南皮書憶阮  
瑀行經北館歌悼子侯不足輩此深仁齊茲舊愛

藝文類聚

立志尺牘  
作同志誤

停省臨城公夫人見妃令

大同五年臨城公婚  
夫人於皇太子妃為

姑姪遂見之制議者  
互有不同皇太子令

纁鴈之儀既備合於二姓酒食之會亦有因不失親若  
使榛栗服脩贄饋必舉副筭編珎盛飾斯備不應婦見

之禮獨以親闕頃者敬進醢醴已傳婦事之則而舉盤  
沃盥不行侯服之家是知繁省不同質文異代臨城公  
夫人於妃既是姑姪宜停省

杜氏  
通典

即位詔

太清  
三年

朕以不造夙丁閔凶大行皇帝奄棄萬國攀慕號躋  
身靡所猥以寡德越居民上煢煢在疚罔知所託方賴  
藩輔社稷用安謹遵先旨顧命遺澤宜加億兆可大赦  
天下

原放北人詔

三年

育物惟寬馭民惟惠道著興王本非隸役或開奉國便  
致擒劫或在邊疆濫被抄掠二邦是競黎元何罪朕以  
寡昧創承鴻業既臨率土化行宇宙豈欲使彼獨為匪  
民諸州見在北人為奴婢者并及妻兒悉可原放

改元大寶詔

蓋天下者至公之神器在昔三五不獲已而臨蒞之故  
帝王之功聖人之餘事軒冕之華儻來之一物太祖文

皇帝含光大之量啓西伯之基高祖武皇帝道洽二儀  
智周萬物屬齊季薦瘡彝倫剝喪同氣離入苑之禍元  
首懷無厭之欲乃當樂推之運因億兆之心承彼犄角  
雪茲讎恥事非為已義寔從民故功成弗居卑宮非食  
大慈之業普薰汾陽之詔屢下于茲四紀無得而稱朕  
以寡昧哀莞孔棘生靈已盡志不圖全僂俛視陰企承  
鴻緒懸旌履薄未足云喻痛甚愈遲諒閣彌切方當玄  
默在躬栖心事外即王道未直天步猶艱式憑宰輔以

弘庶政履端建號仰惟舊章可大赦天下改太清四年  
為大寶元年

解嚴詔

元年

近東垂擾亂江陽縱逸上宰運謀猛士雄奮吳會肅清  
濟充澄謐京師畿內無事戎衣朝廷達官齋內左右並  
可解嚴

葬簡皇后詔

簡文帝后王氏名靈  
賓齊太尉王儉女孫

簡皇后窀穸有期昔西京霸陵因山為藏東漢壽陵流



水而已朕屬值時艱歲饑民弊方欲以身率下永示敦  
朴今所營莊陵務存約儉

贈江子一兄弟詔

侯景反攻陷歷陽子一身先  
士卒及弟子四子五相引赴

賊並見害  
太宗詔贈

故戎昭將軍通直散騎侍郎南津校尉江子一前尚書  
右丞江子四通宮直殿主帥子五禍故有聞良以矜惻  
死事加等抑惟舊章可贈子一給事黃門侍郎子四中  
書侍郎子五散騎侍郎

矯禪豫章王棟詔

侯景幽簡文帝矯為詔禪于昭明太子子棟使帝自寫帝

書至此鳴咽不已

先皇念神器之重思社稷之固越升非次遂主震方

南史

梁文紀卷二

欽定四庫全書

梁文紀卷三

明 梅鼎祚 編

簡文帝 二

金罇賦序

舍弟西中郎致金罇一枚周禮云鼓人掌六鼓四金以節聲樂以和軍旅以金罇和鼓金鐻節鼓注曰罇罇于也園如推頭大上小下樂作鳴之與鼓相和淮南云兩軍相當鼓罇相望若古之禮器飾軍和樂者矣吾竒而

賦之

悔賦序

夫機難預知知機者上智智以運已迷已者庸夫故易  
曰吉凶悔吝生乎動者也又曰悔吝者憂虞之象也傳  
曰九德不僭作事无悔是以鄭國盜多太叔之恨表衛  
風義失宣公之刺彰無將詠興壘事書作季文再思而  
未可南容三復而不暇余以固陋之資慎履冰之誠竊  
服楚王之對每徵后稷之詩觸類而長乃為賦

冰一作霜

眼明囊賦序

俗之婦人八月旦多以錦翠珠寶為眼明囊因競凌晨  
取露以拭目聊為此賦

昭明太子集序

竊以文之為義大哉遠矣故孔稱性道堯曰欽哉武有  
來商之功虞有格苗之德故易曰觀乎天文以察時變  
觀乎人文以化成天下是以合精吐景六衛九光之度  
方珠喻龍南樞北陵之采此之謂天文文籍生書契作

詠歌起賦頌興成孝敬於人倫移風俗於王政道綿乎  
八極理浹乎九垓贊動神明雍熙鍾石此之謂人文若  
夫體天經而總文緯揭日月而諧律呂者其在茲乎昭  
明太子縣明離之極照履得一之休徵曰孝與仁窮神  
盡聖豐下表異垂髮應期若夫嵩霍之峻無以方其高  
滄溟之深不能比其大二曜朏蝕而疑明弗虧四氣猶  
爽而履信或一言出知乎微行立彰乎遠湛然玄默巍  
乎莊敬居身以約在滿必冲九德之保無以喻其審諭

六行之傳豈可語其拾遺叔譽知窮師曠心服行一物  
而三善闕固無得稱焉至如翠蕤晨興班輪曉騫胡香  
翼蓋葆吹從風問安寢門之外視膳東廂之側三朝有  
則一日弗虧恭承宸扆陪贊顏色化闕梓於商庭既欣  
拜夢望直城而結軌有悅皇心此一德也地德褰維天  
鷄掩色構傾椒殿沴結堯門水漿不入圭溢罕進喪過  
乎哀毀幾乎滅池綽既啓探擗標之慟陵園斯踐震中  
路之號率由至要之道以為生民之則固以事彰朱草

理感圖雲此二德也垂慈豈弟篤此棠棣善誘無倦誨  
人弗窮躬履禮教俯示楷模羣蕃戾止流連於終讌下  
國遠征殷勤於翰墨降明兩之尊匹姜肱之同被紆作  
貳之重弘臨菑而共館此三德也好賢愛善甄德與能  
曲閣命賓雙闕延士剖美玉於荆山求明珠於枯岸賞  
無繆實舉不失才巖穴知歸屠釣棄業左右正人臣僚  
端士丹轂交景長在鶴關之內花綬成行恒陪畫堂之  
裏雍容河曲並當今之領袖侍從北塲信一時之俊傑



豈假問謝鯤於溫嶠謀黃綺於張良此四德也皇上垂  
拱岩廊積成庶務式總萬幾副是監撫山依瑤彩地立  
少陽物無隱情人服睿聖此五德也罰慎其濫書有作  
則勝殘去殺孔著明文任刑逞威伋疵淳化終食不違  
理符道德故假約法於關中秦民胥悅感嚴刑于關下  
漢后流名是以遠鑒前史垂恩獄犴仁同泣罪幽比推  
溝玉科歸理遣之恩金條垂好生之德黔首齊民亭育  
含養咸欣然不知所以然此六德也梧丘之首魂沉而

靡託射聲之鬼曝骨而無歸起掩骼之慈被錫楷之澤  
若使驄馬知歸感埋金於地下書生雖殞尚飛被於天  
上恩均西伯仁同姬祖此七德也玄冥戒節沍陰在歲  
雪號千里冰重三尺炎鑪吐色豐貂在御留上人之重  
愍終窶之氓發於篇藻形乎造次輟宴心歡矜容動色  
歎陋巷之無褐嗟負薪之屢亡發私藏之銅鳧散垣下  
之玉粒施周澤洽無幽不普銜命之人不告而足受惠  
之家食恩之士咸謂櫟陽之金自空而隆南陽之粟自

野而生此八德也陽阿淥水竒音妙曲過雲繁手仰秣  
來風靡悅於胸襟非關於懷抱事等棄琴理均放鄭豈  
同魏兩作歌於長笛終噪漢貳託賦於洞簫此九德也  
怪寶竒琛不留於器服仙珠玉玦無取於浮玩土木無  
綈罽宮殿靡磨礱此十德也承華廣闊肅成且啓秋光  
洞入春花洒樹名僧結侶長裾總集吐納名理從容持  
論五稱既辯九言斯洽如觀巨海如見游龍令羅折談  
名儒稱疾無勞擁經入巷豈假羊車詣門此十一德也

研精博學手不釋卷含芳腴於襟抱揚華綺於心極韋  
編三絕豈直交象起先五鼓非直甲夜而敲案無休書  
幌密倦此十二德也羣玉名記洛陽素簡西周東觀之  
遺文刑名墨儒之旨要莫不殫茲聞見竭彼綈緗總括  
竒異徵求遺逸命謁者之使置羸金之賞惠子五車方  
茲無以比文終所收形此不能匹此十三德也借書治  
本遠記齊攸一見自書聞之闕澤事唯列國義止通人  
未有降貴紆尊躬刊手掇高明斯辯已亥無違有識闕

風長正魚魯此十四德也至於登高體物展詩言志金  
銑玉輝霞章霧密致深黃竹文冠綠槐控引解騷包羅  
比興銘及盤盃贊通圖象七高愈疾之旨表有殊健之  
則碑窮典正每出則車馬盈衢議無失體纔成則列藩  
繫缶近逐情深言隨手變麗而不淫周而不襲如彼羽  
族取喻於鸞鳳猶斯女工方之乎綺縠盛德之源如彼  
文章可聞如此信允屬元良獨高千載既而春風委馭  
零露摧華豈因麟鬪徒觀月毀非聽雉雒坐聞峯墜悲

卷三  
纏教義痛結三才綱智乏效官才無卓爾結景雲霄幼  
逢獎訓左提右挈寔仰聖慈自頂至足恩均鎔造價由  
伯樂此為未儔譽因元方茲無以比情深知己愛切肌  
膚慕德懷恩何時可弭是用編輯遺文條流藻績懸諸  
日月貽範後來凡二秩二十卷如左

臨安公主集序

四德之美戚里仰以為風七行之奇濯龍規以為則若  
夫託勾陳之貴出玉臺之尊鳳儀閒潤神姿照朗愛敬

之道夙彰柔媚之才必備鳳桐遐遠清管遼亮湘川寂  
寞淚滴葳蕤北渚之句尚傳仙靈之典不泯况復文同  
積玉韻比風飛謹求散逸貽厥于後

三日曲水詩序

竊以周城洛邑自流水以禊除晉集華林同文軌而高  
宴莫不禮具義舉沓矩重規昭動神明雍熙鍾石者也  
皇太子生知上德英明在躬智湛靈珠辯均河注騰茂  
實于三善振嘉聲于八區是節也上巳屬辰餘萌達壤

倉庚應律女夷司候爾乃分階樹羽疏泉泛爵蘭觴沿  
泝蕙肴來往賓儀式序盛德有容吹發孫枝聲流岍谷  
舞艷七盤歌新六變遊雲駐綵仙鶴來儀都人野老雲  
集霧會結軫方衢飛軒照日

馬槊譜序

馬槊為用雖非遠法近代相傳稍已成藝鄧麓縈魏后  
之庭武而猶質種馬入丹陽之寺雄而未巧聊以餘暇  
復撰斯法搜採抑揚斟酌煩簡至如春亭落景秋臯晚



靜清霜且盡密雨初晴纖驪沃若天馬半漢盼金精而  
轉態交流汗血愛連乾而息影不畏衣香雕衢與白刃  
同暉翠眊與紅塵俱動足使武夫憤氣觀者衝冠巴童  
畱玩不待輕舟之楫越女踟躕無假如臯之箭

清霜且  
盡密雨

初晴一作嚴霜  
盡降密雲初晴

### 彈碁論序

觀夫模穹蒼而挺質寫博厚而成形峙五岳而標竒停  
四海而為量協日月之數應律呂之期總玄黃之武略

校孫吳之應變語其用心壯哉之戲也爾乃觀壯士之  
出師望兵碁之式道上昇則博翼穹天下赴則建瓴高  
屋乘危則棧山航海歷險則束馬懸車完五憶霸國之  
勲全六想陳平之智八反均高陽之數四角思漢后之  
歌飛瓦同晉侯之琴徘徊異鄴中之輦牽牛覺乘槎之  
來織女擬雲駟之去故古人或言之禮樂或比之仁讓  
或喻以修身或齊諸道德良有以也

有以一  
作有音

南郊頌

臣聞惟天為大聖人敬其德知幾其神至人契其道故  
龍官弱言之后合揆於蒼昊鳥紀垂衣之君昭格於上  
帝莫不巍巍乎穆穆乎渙汗於綠篇氛氲於丹冊者矣  
我梁皇帝之御天下也乘燁祇之盛曜即璧月之遐照  
等乾覆之燾養合坤載之靈長四三五六之意十堯九  
舜之明名與功偕業將時並自撥亂反正伐罪弔民馮  
玉几握金鏡君臨萬國於今二十有二載也緯天維理  
地軸移澆風於末俗反淳正於區中化不言而先顯教

不嚴而已肅流樂復雅遠符雲韶之世隆禮還章非因  
忠信之薄九垓同軌四海無波儲明燮照儀天作兩三  
袞咸作叶化台光麴蘖王風鹽梅帝載塵清世晏蒼兕  
無用其武功運謚時平鷓鴣咸修其文德桃林散甲華  
山發刃玉門罷堠紫塞沉烽屠羊釣壑之士厭洗耳而  
襲簪佩版築藏巖之逸去滌穀而紆珩組異人俊乂既  
間出而在官世鏡河仙亦雍容而廊廟蹇蹇同于多士  
諤諤比乎得人五典三墨既歲蕤於壁水九流八索亦

續紛於石渠畫一之政萬代表於時和三章之律百姓  
沐於仁壽於是龍光之地日浴之鄉紫舌黃支頭飛鼻  
飲自西自南無思不服欵關質子稱臣內向珠樹素禽  
越火枝之地銀甕邛杖踰沉羽之涖出赤野而連翩度  
玄妙之泱漭於是嘉祥被衆瑞登金人澤馬丹甌玉鷄  
三角九尾四眉六足抽鋪地之九莖發端門之連理參  
差於郊藪布濩於宮闕府無虛月史弗能記周稱黃鳥  
之旗夏有玄珪之錫無以踰此嘉祥方茲摠萃道洽世

昌國殷民阜鄉知舜讓邑比堯封委粟西畝神絲被澤  
可謂我化若風民應如草我靜如鏡物動猶烟天子猶  
未明求衣日昃不勅撤膳匪躬詢輿訪道鑿旗徐動棄  
千里而弗乘寶瑟無虞捐百金而不服廣行四等被慈  
雨於枯根大闡三明驚法雷於羣夢曲成萬物去殺愛  
生幽弊之民與蒼雷而共悅否滯之義同谷風而開舒  
昆蟲得性跂蠢欣生三驅有緩前之禽九門無餒獸之  
藥至德之事如此太平之風如彼乃以恭肅神祇理通

孝敬江左以來爽塏未闢爰命將作揆日載營三靈叶  
響百工咸事宛如神造儼類仙居冲秘隱嶙跨千畝於  
晉日閒曠麗遠吞七里於漢年五達四通廓郊彌野南  
瞻重嶽北眺芒嶺東臨灞澹西望舊豐紆徐委蛇丘陵  
起伏澎湃堯光山川異態飛梁邃宇洞燭穴懸紫殿仙  
宮霞騫鳥翥霧映倒梁日光疎飯玉桃卷葉銀樹抽芳  
百果千株三珠八柱朝葉與密露共鮮晚花與薰風俱  
落露禽乍聚望比翼之翱翔歸飛時宿聞同心之夜響

故以熊熊灼灼炷兩明而仰七曜紛紛沐沐承五煙而  
帶三靈圓丘閉靜紫壇肅設五精之場千神之位八堦  
弘麗四維博敞宛若干仞狀懸流之仙館煥如五彩同  
瑤山之聖壇石牒神昌之瑞方璠金縷飛光之微永固  
是雕是琢鄙茅茨之為倫非珠非玉嗤甘泉之已奢望  
昔方今獨高千古沿襲異等質文斯中於是歲在單閼  
星次訾陬律中太簇日惟辛卯特有事於南郊甸師清  
野封人壝宮朱幕夕峙帷宮宿設曉漢斜陰挈壺升漏



天子御玉輅動金根八驥揚衡雙龍翼蓋雲罕徐迴鳴  
鏡韻響風承豹尾日映鷗冠萬騎天行千乘雷動石鎧  
犀衣之士連七萃而雲屯珠旗日羽之兵亘五營而星  
列鬱鬱阡阡震震填填充溢乎國都彌漫於鄜邑者也  
若乃迴輿降蹕薦禮帝儀揖太清秩羣望被大裘服山  
冕恭蒼壁之明祀穆靈壇之禋敬黍稷非馨明德惟馨  
日曜彤精天澄翠色百僚師師九官濟濟千神叶福萬  
億均慶六典斯備三禮必該焚柴告成罔不歛若翠煙

升錄同河濱之瑞雲丹燎燭天若帝鄉之美氣雲門麗  
舞咸池廣樂已叶九韶之曲復諧六列之奏金匏既動  
望蜿蟬之遊龍玉磬徐鳴觀參差之舞鳳桂轄駕肩士  
女填壺接袂為幃連裾猶堵鼓腹擊轅行歌舞抃然後  
紆玉輦而謝書生登靈臺而望雲物欽明美化跨萬古  
於茲日廣運愉樂表千載於當今方當巡云云之禮啓  
亭亭之業封天答睠禮地徵靈南山之壽無極七百之  
基長固豈不懋哉豈不盛哉菲薄微臣謬與藩服馳心

休禮秣馬之願無由徒罄褊辭清風之藻多愧敢敷庸  
理獻頌十章其辭曰

元始道一渾德氛氲遙哉邃古夙矣初分磅礴地載清

朗天文大人覩物生民樹君其一蛇軀龍準作樂垂衣皇

圖炤灼帝篆歲蕤廓寥中代合聖與誰於鑠我后命世

天飛其二玄默馭辯寂照秉真就雲握歷望日臨民謙光

履德義禮稱珍車書同軌天下歸仁其三期章孔備盛化

弘道酌衢敬賓欽賢愛老變正是珍燭車非寶如海之

深如日之杲

其四

肅恭明神迅聽前踵配天道尊迎陽義

重玄酒陶匏燔柴雲聳跨舜論韶籠堯稱拱

其五

赫矣郊

宮載惟靜謐肅肅禁闈陰陰仙室六戎列野八鸞照日

架殿星羅重宮霧出

其六

蒲萄金橘靈壽木難素奈開暑

貞檜凌寒山池壯麗階閣彤丹葉垂疊雨花落重巒

其七

康哉盛德美矣世豐三辰炳耀七政永隆五方來洎四

隩茲通懸繩度筭駕鹿追風

其八

既隆懋化復覩瑞滋金

車出野玉露霑墀紫檠神草華平瑞芝長愉汪濊永固

雍熙其九照天漏洩遠肅邇睦惠靡齊民恩彌比屋式光

惇史踰斯郁郁皇哉康哉同斯景福

其十

### 馬寶頌

皇帝應百姓之心副四海之願復履玉衡還臨億兆天地交泰日月貞明至理惟新隆平方始遐邇一體中外禔福含生欣欣若耘耰之逢夏雨懷情坎坎譬草木之值春風帝王之道超邁開闢睿聖之功殫歷邃古軒義不足鑿杓堯舜不足憲章至哉大哉無得而稱也五月

丁酉朔絲竹會於德陽之堂於時日進內宮星次鷄首  
仲夏之晷稍極陽城之圭蕤賓之鍾初應潁川之律縉  
雲旦卷南風晚扇惠氣入帷清陰周宇玉輿雲罕照日  
充庭羽林中權分階列校簪笏成行貂纓在席昭天之  
樂金石鏗鏘報地之禮威儀肅省詔以馬寶示羣臣太  
僕効官趣馬掌贊三令五申丞聯事舉八麗四圍給役  
相趨暉煜金鑣陸離寶勒天地無疆之德永星致遠之  
功鸞盼善鳴龍儀美稱沸毅權竒之威趨攄抑揚之態

足轉驚電眼流含燭霧噴紛霏流沫飄洒數千為壽豈  
待原蠶之禁萬里一息不藉杜衡之草王良不能控其  
衡策伯樂不能辨其文機方知總轡崑岑周非吾馭張  
樂大野夏有慙德豈止沉河用辟獨有綠文之稱盛德  
在木偏受蒼龍之名至于千將寶劍遙服晉鄭之軍蓮  
花烏玉騰威大海之際况乎馬寶義實踰之方當風沙  
自歸滑橋屈膝款關入塞偃武修文去病無出師之勞  
充國罷議邊之略五律成珍九河如鏡臣謹按瑞應經

彌勒成佛經中阿含經覽愚經並稱第三之馬者三千  
歲華子云堯漢皆得馬者堯漢皆火德正斗南方乘德  
而至也豈非聖德汪濊皇風洋溢研機洞元備禮達義  
是以天不愛道白馬嘶風王澤効祥朱鬣降祉比夫圓  
蹄方足躑躅在郊風嘯電奔聲遨處囿五彩依樹三雀  
登巢安髣髴於當今弗擬議於休應百辟卿士咸稱萬  
歲伊臣不佞結慶雲霄親承詔旨預觀寶瑞手舞足蹈  
贊揚不足宴禮斯畢退而作頌其辭曰



帝廣運德欽明儀郊升道形聲德為軌仁作經璇璣正  
太階平割五禮和六英開四攝行八政轉輪皇飛行聖  
愍含識資惠命引蒼生歸法性菩提真般若淨七寶均  
萬邦寧遯悼史觀陳詩域中大唯聖期聞玄妙復孝慈  
解流澤隨因時刑已措績咸熙三農盛九穀滋萬祇悅  
八神怡律有節歷得天景星曜慶雲連珠為月醴為泉  
民何幸值皇年乾道應坤馬來度玉關升金臺鏤錫煥  
鸞鑣迴紫雲轉堞塵開千天駟百龍媒永伏阜掃駒餘

秣瑤粟委芳芻九夷歎四表清眈胥樂輿頌興

行雨山銘

巖畔途遠阿曲路深猶云息馭尚且抽琴茲峰獨擅歛  
崎千變却繞畫房前臨寶殿玉岫開華紫水迴斜谿間  
聚葉澗裏縈沙月映成水人來當花藤結如帷磧起成  
基芸香馥逕石鏡臨墀

明月山銘

迢遞峰長威紆岳聚既正書門兼同天柱非競小山寧

論大庾豈學土龍詎須石鼓緞色斜臨霞文橫豎

書案銘

刻香鏤彩織銀卷足照色黃金迴花青玉漆華映紫畫  
製舒綠性廣知平文雕非曲厠質錦帷承芳綺縟敬客  
禮賢恭思儼束披古通今察姦理俗仁義可安忠貞自  
燭鑒矣勒銘知微敬勗

映御覽作  
曜理作糾

鏡銘

金精石英水輝沼清高堂懸影仁壽摘聲雲開月見水

淨珠明

紗扇銘

欒

𦉳

𦉳

風

𦉳

霜

照

日

丞相長沙宣武王碑

金表龍符綠地龜圖且稱瑞漢寔曰閑虞於昭帝緒蟬  
聯厥初有微玄水亦作司徒重擔偃蹇曲注逶迤雲櫺

鳳翥桂棟蓮披文擅晚麗采節晨輝春藤絡戶寒菊臨池惟馨惟德無絕于斯

長沙宣武王北涼州廟碑

黃曲之祀九井尚慙洙水之堂七壁猶在豈非德含體氣神降空桑蒸民仰其立功太上懷其貴德公諱蘭陵人皇帝之長兄也命世降靈峻極開著宗百川而成海倍萬俊而為英為南梁北秦二州刺史華陽黑水改號難堪加以岳牧遷迴軍民徙散同高闕以為塞象玉門

而置關三尉寢謀六屯罷業功同踈勒之守備甚即墨  
之堅圍公臨危制變殷如敵國是以六角摧鋒兩賢釁  
鼓指撓則破勅敵叱咤而靜邊塵公德應大賢照惟殆  
庶如鍾資叩似鐸發聲含朝發于千仞散風行于萬頃  
神武所向士卒忘水火之難篋醪所驅小大一死生之  
志微管之風餘芳無絕人畏其神德音不泯梁秦二州  
刺史宜封侯條刺舉漢陽親睹遺愛自表請立碑置廟  
天子許焉反宇飛風伏檻含日參差丹桂周流紫房躡

跣刻獸下臨網戶  
齒苔荷華倚連屈  
屋庶使邊韶所立  
之石豈稱高於陳  
郡袁逢所勒之字  
非獨擅於華陽乃  
為贊曰帝圖開道  
皇源配天功書綠  
字事燭青編天漢  
之陽黑水惟梁如  
仁永播流詠寧忘  
扶風高碣召伯甘  
棠餘芳無泯望古  
可方構斯象室循  
茲洞房琉璃照戶  
璧玉開堂秋條下  
葉春卉含芳九微  
夜火百味朝漿

吳興楚王神廟碑

昔者武王詢于太公五神之禮  
正伊陟贊于巫咸三篇

之義作抑又玄矩司于坎宮漢興北時黃虵感于通夢  
秦作西郊幽則鬼神其來已尚楚王既弘茲釋教止獻  
車牛既舍黃駒安俟駢角掌擊無左滌之勞牧人止福  
衡之務周房殷俎惟有玄澗芳芝玉笋瑤樽止陳丹桂  
清酌漸符不殺之教方行大士之心比夫黃樹赤光紫  
衣朱髮茂矣哉王制云山川神祇有不舉者為不敬太  
守元景仲稽諸古典於茲往烈永傳不朽式樹高碑翠  
石勒文事偕神掌靈龜負字還擬洛書



徵君何先生墓誌銘

先生履玉燭之禎氣應大賢之一期實生而知機撫塵  
斯庶敬非習起孝乃因心聚徒教習學侶成羣與沛國  
劉猷汝南周顒為友陸璉賀瑒之徒更道北面永明中  
王文憲儉受詔撰禮未竟而卒屬在司徒文宣王王以  
讓先生因廣加刊緝故以含文燕居說六典五恩之義  
或齊侯所不鎮孟嘉所未知皆折茲大物成此良教小  
人道長每諷考槃之詩君子道消便執天山之筮乃毀

車挂冠拂衣東嶺始居若耶來從秦望今上經綸天地  
權輿鼎業始微為軍謀祭酒實允文若之舉且光彥先  
之選又微特進右光祿大夫高尚其事確乎不拔立纁  
徒往束帛虛歸而給白衣尚書祿固辭不受卒窆乎其  
山正衾在殯嗤鏤器與玉衣堯典入棺心密章及書綬  
知與不知並懷惋愴咸以人亡素楛禮墜文章洙泗顏  
經扶風罷學關西疑聖之德自此長淪高松引風之氣  
於茲永息余昔在朱方亟枉翰迹歛風味道迄淹歲時

既而位阻桂宮途乖咫尺不獲擁經步至問春卿之病  
徐輪三反入杜夷之舍痛祥雲之滅采悲烈曜之晞輝  
追勒高鄉乃為銘曰文範高世玄晏絕倫復有令德遠  
之與均誰與均此嗚呼哲人第五肥遁餘軌尚遵司空  
開學其風不泯傳茲孝敬曰悌且仁氣高瓊岳心虛谷  
神括羽儒囿舟輿席珍既遊慧水兼引法輪談扇猶在  
鳴琴尚陳如何不憇德素長淪寂寥巖穴荒涼渭濱橋  
曰隻鷄徐稱酌素余飲夫子風期夙著蓄思含毫傳芳

寫譽沈礎雖貞玄泉無曙

華陽陶先生墓誌銘

若夫真以歸空為美道以無形為貴不知悅生大德所以為生不知惡死谷神所以不死妙矣哉隱顯變化則物莫之測既而岫開折石天墜玉棺銀書息簡流珠罷竈九節麗于空中千和焚于地下仙宮有得朋之喜受學震臨谷之悲余昔在粉壤早逢圯上之術今邁元良屢稟浮丘之教握留符而惻愴思化杖而酸情乃為銘

曰無名曰道不死為仙亦有元放兼稱稚川猗歎夫子  
受籙歸玄黎傳苑吏書因賈船虎車照景蛻拂凌煙餘  
花灼爍春澗潺湲鬱鬱方崖悠悠洞天三山白鶴何時

復旋

方崖一  
作茅嶺

### 中庶子王規墓誌銘

玉挺藍田珠潤隨水價重連城聲同垂棘偶應龍之籥  
影等威鳳之羽儀名理超于荀王博洽侔于終賈稍遷  
侍中佩玉璽於文昌珥金貂於武帳文雅與綺縠相宣

逸氣並雲霞俱遠副君取敬杜夷時迴晉儲之駕追嗟  
徐幹亦降魏兩之書爰發睿辭為銘云爾銘曰七略百  
家三藏九部成誦其心談天其口勝氣無儔高塵誰偶  
榮珪掩采靈劔摧鋒宋郊淪鼎洛水沉鍾玄扉不晝幽  
夜恒冬

安成蕃王墓銘

許氏猶龍荀家鳴鶴豈如宗子分聯華萼對策雲臺觀  
書麟閣官美登朝文高入洛得意琴書忘言丘壑

中書令臨汝靈侯墓銘

昔太祖時其惟宣武講道開天儀嵩作輔是曰邢茅籍  
規承矩如康嗣衛似禽居魯息轡巖隈塗窮夜臺靈檐  
永閔松路方開草茂故轍松插新枚月明泉暗暑往寒  
來

儀同徐勉墓銘

朱弓表瑞寶劔攸歸長瀾斯注瓜瓞含輝舉直斥偽校  
名責實朝有進賢野無遺逸違天即地歸幽去明空谷

傳鼓哀風送鈴

平西諮議叅軍劉顯墓銘

顯字嗣芳沛國相人  
岳陽王長史遷平西

諮議叅軍大同九年卒簡文帝為皇  
太子之遷啓請乃蒙令為誌銘曰

繁弱挺質空桑吐聲分器見重播樂傳名誰其均之美  
有髦士禮著幼年業明壯齒厭飫典墳研精名理一見  
弗忘過目則記若訪賈逵如問伯始穎脫斯出學優而  
仕議獄既佐芸蘭乃握搏鳳池水推羊太學內叅禁中  
外相藩岳斜光已迫殞彼西浮百川到海還逐東流營



營返魄汎汎虛舟白馬向郊丹旒背鞏野埃興伏山雲  
輕重呂掩書墳揚歸玄冢爾其戒行途窮土壟弱葛方  
施叢柯日拱遂柳萋春禽寒斂耗長空常暗陰泉獨湧  
拊彼故塋流芬相踵

梁書

太子舍人蕭特慕誌銘

威鳳五色朝陽千仞孫枝發響將雛流韻馥哉若蘭頌  
矣懷瑾能既誕子恒乃懽眉銀鈎之巧重世適雋况此  
臨池蟬輕露潤丹旒輕飛哀歌徐引壠水春帷山雲晚

陣

司徒始興忠武王誄

皇源地闡帝業天維於穆忠武光國之基爰自弱齡英  
明播越玉潤水鮮山靜雲發帝曰爾諧僉議彼屬推轂  
兩江建旗三蜀將旋上國戀結四民三鱣表服二鹿隨  
輪方變正袞永範時規天弗報善哲人其萎響哀挽於  
北邙去承明而不入望參差之旒影聽潺湲之雨泣

大同哀辭

大同子之第十九子也生於仲秋殞於冬末悲夫潛慟  
結于心愁眉慘於外夕坐於是申旦當食以之不甘客  
有謂予曰死生常也夫壽命也陳蕃所憇之家久記玄  
錄之歲華歆所聞之語已定北陵之期上聖所以忘情  
賢者所以達節將何戚焉予對之曰觀其明眸豐下玉  
色和聲豈不登髻歲而擬觸藩及紈袴而知折李靈心  
摧於毫末慧性挫於趾步庶方悟於來途遂窮魂於短  
日豈不傷哉乃為辭曰

含精鬱抑歎嗟何極云誰之悲悲予弱息實天道之偏  
頗觀賦命之殊忤彼神蔡之靈長獲萬春之悠緬有舜  
華之照灼寄一朝之浮命始夢熊而兆吉遂設弧而表  
慶驗天蘭之所受知地井之可映愛萱草之有微欣赤  
弗之在詠信歎慰之未幾悼天零之云及乃變樂而為  
悲遂改笑而成泣昔珠祿之交舒又金香之相襲藉綺  
茵於弱肌隱孩笑於羅帷今獨親於玄壤亦何痛其如  
之憶餘態而心楚想媚質而迴腸藥尚殘而染地衣猶

襲而在床卷金屏之四葉開銀函之九羊忽徘徊而想  
象曾何時而不傷於是風景暮鍾氣嚴晚候葉款款而  
走堦水粲粲而鳴漏月半鏡而開河雲羅柱而下岫燈  
發焰而吐花火含光而成就金鹿之恨涕沾衣金瓠之  
哀還掩扉猶茲紫山明玉碎譬彼西都芳草腓終無逐  
浪鳧船反何時復聞龍種歸

文記立錄英華作父  
傳紀錄知藝文作仰

### 祭戰亡者文

降夫既旋功臣又賞班荷元勲蘇逢漏網校尉霑榮屬國

蒙獎獨念斷魂長畢灰壤膏原染刃委骨埋泉徒聞身  
沒詎辯名傳

祭灰人文

積注奄旬祭在灰人消茲獸炭焚此桂薪積如玉屑聚  
若遊塵庶人之風不拂獄吏之慢寧陳當令金光小史  
侍使玉童奏雲師于執法力水伯于天宮鑷星誅於電  
女貫索囚于雷公廓重氛于八極靜連絲于四空既瞳  
瞳于車蓋又赫赫于飛盤且凝威於趙盾實望近於長

安

答穰城求和移文

屬彼數及侮亡運逢瓦解石言水鬪實驗地凶飛絮雨  
粟還符天怪故淪俗駿奔遺黎南請所以皇略北征事  
同拯溺愍百姓之未安傷一物之失所故餘民襁負掃  
地來王而向化之黨忽覽今移咸以陶茲禮樂重覩衣  
冠已變伊川之髮兼削呼韓之衽寧當生入玉關死歸  
建業民情若此匪我求蒙行人遠屆實亦勞止想近察

時機遠詳圖緯早去中原遽反桑梓旋地脉而北移越  
天渠而南指然後三姓二賢可存十半如其遂固守株  
不達玄象將恐衛將之師復有狼居之戰應侯之討更  
覩陰山之哭

勸醫論

勸醫曰天地之中唯人最靈人之所重莫過於命雖修  
短有分天壽懸天然而寒暑反常嗜欲乖節故虐寒疢  
暑致斃不同伐性爛腸摧年匪一極斯之要實在良方



故祇域醫王明於釋典如大師乃以醫王為號以如來  
能煩惱病祇能治四大乖為故亦有騷人之詠彭城秦  
國之稱和緩季梁之遇盧氏號子之值越人爰至久視  
飛仙長生妙道猶變六一于金液改三七於銀丸蓄玉  
匣之秘研紫書之奧桃膠何是北斗靡遜其形金漿非  
遠明珠還恥其價能使業門之下鼓響獨聞雍祝之偈  
簫聲猶在周禮疾醫掌萬民之疾凡民之有病者分而  
治之歲終則各書其所治而入於醫師知其愈與不愈

以為後法之戒也至如研精立理考覈儒宗盡日清談  
終夜講習始學則負墟尚諛積功則為師乃著日就月  
將方稱碩學專經之後猶須劇談網羅愈廣鉤深理見  
厭飲不寤惟日不足又若為詩則多須見意或古或今  
或雅或俗皆須寓目詳其去取然後麗辭方吐逸韻乃  
生豈有秉筆不訊而能善詩塞兌不談而能善義揚子  
雲言讀賦千首則能為賦况醫之為道九部之診甚精  
百藥之品難究察色辯聲其功甚秘秋辛夏苦幾微難

識而比之術者未嘗稽合曾無討論多以少壯之時涉  
獵方疎略知甘草為甜挂心為辣便是宴馭自足經方  
泯棄同庖數之讀莊子異孔丘之好周易然而疾者求  
我又不能盡意攻治假使不能為地自可即為已益所  
以然者若無隔貴賤精加消息以前驗後自可解之日  
知所亡坐成妙術而又告以不能也治疾者衆必以孟  
浪酬塞悞人者多愛人者鮮是則日處百方月為千軸  
未嘗不輕其藥性任其死生浮華之功於何而得及其愛

深親屬情切支肌患起膏肓興府俞雖欲盡其治功  
思無所出何以故然本不素習卒難改變故也胡麻鹿  
藿纔救頭痛之疴麥麴芎藭反止河魚之疾思不出位  
事局轅下欲求返死者於玄都揚己名於綠帙其可得  
乎術道困窮於斯寔至誠當善思此意更興其美非直  
傳名于後亦是功德甚深比夫脫一鷓於權衡活萬魚  
於池水不可同日而論焉

七勵

藏名外臣體道好異遁跡埋影剗心人事任性於蓼水  
之側放心於自得之場情苞六合德貫九方巖棲谷飲  
絕際濠梁於是寂鏡公子聞而往說乃飛車翠蓋翔駕  
絳螭丹旌風轉碧幔雲移映玉軌之綺靡照銀車之陸  
離經九嶠之負阻歷五曲之噴危路入閭風道經通谷  
橋塗泱潑路林肅肅石蹬穹窿松關重複羊腸望斷邃  
路迂餘攀林稅駕乃遇藏名之所居其居則蘚苔沒砌  
幄葉斜林千峰沓頂萬仞懸深南危碧流北障芳林左

縈重陸右背高岑烟霞罩日石澗籠陰聲音百籟響弄  
千禽寂翫公子曰蓋聞智者不懷道沒志遺俗埋名迷  
邦碎寶却粒辭榮今欲說子以默語之術寧欲聞乎藏  
名曰僕雖幽栖遠紆名德寧忘潔已以受至言

公子曰夫怡情託體寔寄門宮跨危樓於挿漢挂日景  
於迎風玩靈華於仙掌度窈窕於飛虹金枝照耀玉壁  
玲瓏文窻洞右飛閣陵東挂挂通光雄梁亘日壁鏡鈕  
懸抽荷并出中宿綿延長廊周密青錢碧影金墀玉律

冬閨溫煦夏室含霜圖以珍怪畫以禎祥瓊茅秋藹綠  
蕙春香植宜男於粉閣樹君子於椒房迴風烟於璇題  
垂珠璣於玉箱文魚水宿錦鳥雲翔乃登陟遊踐望遠  
通疎擢素藕於石鏡寒蔓草於康衢若荆山之琢玉似  
隨水之弄珠若斯宮之閑麗子能與我而共居外臣曰  
僕遊心蓬葦未暇斯處

公子曰夫靚粧嚴服託體必嘉五絲擅美獨繭稱華組  
帷粲綵綵服含葩丹墀聚葉鏤檻飛花至如稷下縫掖

洒上章甫雉緝霜鮮秦絲園縷鳳色龍分鴛文鵠聚瑀  
紛瑤席綺飾瓊佩齊都滑石南海瑋瑁散以綴珠離如  
並績蜘蛛弄巧越女調樞夏則桃笙竹席冬則青莞金  
鬚溫麗瓊臺密華承寢當戶之穀大文之錦華蒲萄之  
綺衾麗芬若之丹枕金蘇翠幄玉紫象牀子能從我樂  
此芬芳外臣曰帶索披裘自得山性雕章麗服未敢攸  
同

公子曰五甃調神三芝輔性用康仁壽以弘貞正乃使



有伊之徒調嘗鼎味九州珍雜八方豐貴名廉天地之  
聲般竭山海之味蟬鳴秋稻鶯領玉精離紅之膾勺藥  
之羹蒙山擅重灌水傳聲桂蠹石瓊龍胎鳳肺四膳八  
珍五肉七菜纍似穀雜切均鮮繪色若紫蘭紛如紅粹  
若乃越梅變實楚醴方添陳晨鳧之美味薦雋鷺之肥  
甜洗以三危之露水調以大夏之香鹽霜薤沸烈露葵  
繁舒芳菰之菜白霜之茹澄瓊漿之素色雜金筍之甘  
菹素醴浮氣酈醪凝清獻三爵之踰雅等千日之芳醴

酌玉斗之英麗照銀杯之輕蟻此亦天下之美味子能  
從我而享之乎外臣曰藜藿可膳薇蕨堪餐五味口爽  
寧假玉盤

公子曰若夫鈞臺之樂葛天之歌飛七盤之妙節動六  
變之清和綠綺麗琴丹山寶瑟縷器倅雕孤枝伶律奏  
白雪之楚緩陳亭蓆之吳疾躍鳥追飛潛魚伴出將使  
漸離擊筑雍門鼓琴鳴繞梁之妙響發愁眉之清音至  
如五陵金穴六郡豪家遠流歌於東夏出秘舞於京華

金鈿設翠步搖藏花遙同暮雨逼似朝霞髮鬢如點織  
腰成削玉齒笑容紅粧綽約疾趨巧步霧袖芬披舒蛾  
眉之窈窕委弱骨之逶迤載金翠之婉嬋珎瑤璫之陸  
離芬芳於梧春之苑灼爍於長州之中于時斜光西委  
薄霧舒紅隨珠照影羅衣從風觀者方堤覩者盈淇令  
二鷺之綴翼使八鶴之增悲明君為之斂泣西施為之  
解眉於是蘭閨寂晚曲韻相和對輕風之落景望明月  
以清歌歌曰酣醕半芳樂既陳長歌促節綺羅人拂鏡

弄影情未極迴簪轉笑思自親此亦聲音之盡妙子能  
從我而聽之乎外臣曰淫聲亂耳未足入聽方追山壑  
永弄林泉

公子曰夫心遊百氏理奧六經樞機性道陰陽杳冥昭  
玉牒於年史覽古記而照情若夫鄒枚上客揚馬俊人  
揮金入趙易服歸秦賣舌彈劍買義追仁商權萬古弋  
釣陶甄池中水黑席上稱珍判二氣之氛氳辨六爻之  
終始鳥變龍工鳳書雲紀辭弘八索辨崇三耳至如范

睢折脇豫讓拉齒禮竭中心報深國士碎玉爭城藏圖  
解劔見碣石之金堤望楚都之揚塹美陳平之反間揖  
子房之智謀想秦君之傳器仁漢后之解裘此亦天下  
之奧籍得性之林圃子能同覽悅目以齊此心外臣於  
是色動清顏頓解高意曰僕雖野陋頗悅帶經但負薪  
多疾未甘斯說

公子曰夫氛氳構象純雜不同共工折柱雖播英風自  
古而然曾何足道但吹沙役寇抑自犧年吐霧藏妖聞之

堯日至於今者昌運天啓握歷寶年風猷駕層漢道德  
漏重泉至如玄蹄外境紫舌頑人悖而無禮不沫皇仁  
於是騰三泉之宵漫戴五旗之飄揚引玉車於西隴鳴  
金鼓於北邙拭龍泉之雄劍瑩魏國之寶刀鋸踰巨闕  
利擬豪曹至如牽鉤壯氣斗膽豪心綠腰白玉帶佩黃  
金酬恩報死尅遠長岑騷裒白鷺躍躍青離五玉察善  
十相無遺連腰錦帶半足塵飛標威于鴈門之境振旅  
于龍突之鄉若乃驚沙絕岸苦霧綿長秋河曉碧落蕙

山黃紅顏素改玄鬢斑霜征夫抵掌而飲膳壯士憤氣  
而沸腸迴雲鳥之密陣背却月而相望旗才轉而漂杵  
鋒未至而驂傷前鋒紛其易幟後騎決其沙囊何湯雪  
之能比豈拾塵之可方於是呼韓頓頽龜茲銜璧羊牽  
既袒熊山已積九截同文八極齊軌帝曰念功班茅賜  
履青紫如拾賞歸詔美此亦天下之壯績子能從我而  
效之乎外臣曰葛伯不祀雖聞湯誥野叟力弱未敢振  
衣

公子曰堯舜垂拱煥彼前聞今惟聖歷萬代一君璧儀  
照氣玉井珠分德合天地道方華勲滄海碧徹黃河黛  
文愛人育德澤等春雲宣尼茂典周姬禮容黃裳進士  
青襟俊童邦知改俗國化移風賣藥無藏名之老河泗  
無洗耳之翁德星夜映慶雲晝色異草雙條靈禽比翼  
狐尾既九茅脊復三金盤漾寶銀甕呈甘康歌壤笑悅  
禮樞談隆周謝德盛漢知慙慈照無生化湛靈覺散滴  
弘淳拯澆敦朴國被仁壽家欣教學三明鑒道六度弘



風出塵照苦入冥觀空善識無盡因性必通天不愛寶  
地無隱瑞百神受職三苗奉義石策紫泥繩金玉刺或  
託諷梁甫權卧德而龍盤或織箔渭濱恥藏名而鳳跂  
於是露點胎蜜溜泓澄於玉掌雲垂五采覆旖旎於仙  
樓漾醴泉於浪井拂垂揚於御溝或聯七葉一姓五侯  
外臣於是觀色內動神貌外移忽正山中而言曰蓋聞  
幽居獨善見譏往聖儻不遺矇叟亦願順來命

連珠

三國典畧曰梁簡文  
為侯景所幽作連珠

吾聞有古富而今貧可稱多而賑寡是以度索數下獨  
有衰神松栢橋南空餘白社


吾聞言可覆也仁能育物是以欲輕其死有德必昌兵  
踐於義無思不服

吾聞道行則五福俱奏運閉則六極所鍾是以麟出而  
悲豈惟孔子途窮則慟寧止嗣宗

幽繫題壁

簡文為侯景所幽題壁自序  
又為連珠三首文甚悽愴

有梁正士蘭陵蕭世績立身行道終始如一風雨如晦  
鷄鳴不已弗欺暗室豈况三光數至於此命也如何



梁文紀卷三